

聖堂築跡之旅：以信心建造的殿堂

受訪者：甘銳濤（下稱「甘」）

訪問者：記憶校園訪問組（下稱「訪」）

訪問日期：2011 年 2 月 25 日

訪：我哋先自我介紹吓，我哋就係記憶校園訪問組，主要想搜尋番關於學校歷史方面嘅資料。好高興能夠邀請你接受訪問。首先，第一條問題，可唔可以講吓你同聖士提反堂嘅淵源？

甘：如果講番我個人信仰嘅歷史，喺我哋禮拜堂來講都好長遠了。如果單獨以我個人，我就從 1960 年，或者 1961 年，唔係記得很清楚了，就已經返呢間禮拜堂。如果講埋我太太，她的家族就更加遠。我太太已經係第三代喺呢間禮拜堂。她的爺爺，父親那代，也就是我先岳父那一代到她而家一代。而家子女都係在呢間禮拜堂。如果數起上來，計埋我太太嗰邊，已經過百年歷史了。

我個人嚴格來講係冇離開過。咁點解講係嚴格來講呢？因為有一段日子，我喺外國生活。不過喺外國生活，我都係返聖公會。我個人的睇法就係教會喺地上係一個，不論係咩宗派，教堂可以好多，唔同的名稱，或者唔同的宗派，大家都係信同一個上帝，有同一個信念，讀同一本聖經，接受同一個聖禮。所以來講是沒分別。因為我成長的階段喺禮拜堂，我本人就比較求知慾或者叫八卦性強，所以好多嘢我都係略知一二。我所以一聽到你哋的邀請，我二话不說，就答應了。所以你哋唔好有任何的芥蒂，我知道咩就會講咩。尤其是早期呢間學校嘅建立，同埋負責校長、老師、主任，有啲我都係相熟的。

訪：我哋想問吓你可唔可以幫我哋講述吓聖士提反堂第二代建築有咩特點？呢度有啲相。

甘：如果你講第二代，其實呢啲就唔係第二代，我哋而家叫咗第三代。第二代就係我做細路哥嘅時候喺度崇拜的，因為我六零年代喺度。應該'63 年左右拆，'65 年左右就建第三代，期間可以講係經歷過好多困難、波折。你而家所見到的教堂地址屬於般咸

道，舊陣時的地址喺薄扶林道。薄扶林即係而家學校的位置。因為建的時候有啲故仔，需唔需要我講個故仔俾你哋聽？

訪：好。

甘：先講籌建先，籌建應該係早至戰前，幾多年我就唔記得，應該係一九四幾年之前了。當時的建築費就唔會好貴，幾萬蚊。但唔好忘記，幾萬蚊或者十幾萬，喺當時來講係一個好大的數目。如果戰前來講，啲人打工，據我所知，都係幾蚊一個月。就算戰後，都係一百到二百蚊，好少數目。就算我出來做嘢嘅時代或者'60年代，都係三百蚊，都已經好高人工的了。你諗吓當時要籌幾萬蚊，係好大的功課。籌到之後，想建了，價錢又再上漲。因為點解呢，據我所知，以前借錢沒而家咁容易，唔可以碌卡，出面的銀行也不多，是銀號，兌換銀紙的錢莊。好似恆生銀行，以前都係叫錢莊。尤其是佢唔會借貸俾教會。借錢所以好難，要靠自己籌。籌到咁上下，唔夠，又再籌過。之後，打仗沒晒，好艱難。我哋禮拜堂的圖則都係改過好多次。如果有機會查一查幹事室隔離的房間，我哋叫會議室，有資料喺個度，有幾本書仔，好細本，32開，等於A5。到戰後，再籌款，搞好多籌款方式，好似話劇義演、換物會，即係而家的換物嘉年華，「一人一磚」運動，亦有認捐。即係承諾今後幾多年捐一筆錢，當然錢的數目，對奉獻人有很好的負擔。但認捐唔係一次拿出來，而係每個月每年捐一個額。甚至有啲係借款，這個唔係好肯定，要問問比我更年長的人。借款，係好多教會的做法，有好多教友，因為生活需用，唔可以奉獻咁多錢出來，但佢可以將他生活的費用借出來，教會還番俾佢，按住經濟能力。但呢樣嘢我唔多肯定，好多其他教會，在外國教會，在加拿大教會係有的。但我哋教會，就要問番年長的人先知。我就知道認捐，認捐係一九六幾年，我都有份參加聚餐，喺席上比較環境富庶的教友都有認捐的。花了好大氣力，先叫咗勉強夠開始建築，重建的費用。唔夠就繼續借貸，繼續每年籌款。而籌建而家的禮拜堂都有故仔。初時，籌到錢…應該係戰後，就先在而家的聖堂建，建了一層，等於而家副堂的高度，有兩層高。下面做副堂，上面做活動室、幼稚園。原意就係因為唔夠錢建一部分先，夠錢就再加建。但當籌夠再想加建的時候，建築條例改變了，唔可以再加建。咁就要拆過晒全部再建，又要再使多一筆錢。

對我哋教會，教堂重建工作係好大工程。原本，原意最後又唔得。再早之前經歷戰亂又唔得，經過貶值又唔夠，所以好辛苦。最終'65年先可以重建，將舊堂拆，建新堂。咁崇拜的會眾點樣呢？我哋喺小學健身室做崇拜。（訪：而家叫體育館。）嗯，

咁我哋就喺嗰度做崇拜。咁喺崇拜之前，或者星期六晚，擺晒會眾座位，完咗崇拜就再執好。你哋覺得從相片來講，舊堂同新堂，你哋比較鍾意邊一種建築物格式？

訪：我覺得舊堂比較好。

甘：舊堂喺建築學來講叫做歌德式，好多西方、北美的教堂都係咁。呢個教堂，我細個嗰時喺度做崇拜。嗰度比較細，喺聖壇後面，詩班位有一個通道，我哋叫做古堡密室，好窄，麻石的。走入地牢，我哋細個鍾意走上走落，因為好有特色，好似個古堡咁，全部用麻石做。嗰度來講，我哋好懷戀。嗰度亦都做過避難所，如果你有睇過我寫嘅文章，有提過。咁叫避難所，就係二次大戰嘅時候，日本仔襲港，空襲，好多炸彈放落來。有啲教友就會走落來避難，因為嗰度嘅建築好穩陣。比我哋年長嘅人，印象都好深刻的。舊堂唔係好大，我粗略估計，可以坐到二百人左右，但有一樣嘢唔好，因為佢舊，而且香港潮濕，佢有好多爬藤。你而家見到整個屋頂有好多爬藤，好靚的。但係睇就靚，影相就靚，一落雨就要擺水盆、水桶。第二，有好多白蟻，白蟻蛀，變咗修葺費都比較昂貴，係一個大的負擔。

訪：所以就要拆咗佢？

甘：一來係咁，二來就係因為根本唔夠。嗰陣時，我見到教堂的信眾係好多，幾乎堂堂都坐滿人。以往仲有夜場…我唔記得星期六晚，還是星期日晚崇拜…有夜堂。仲有一點，第二代近著景輝大廈，嗰度有路，一個彎入來呢度。但係戰後，應該係五幾年之後，先可以行車，以往唔可以入車。如果啲人有車就需要喺薄扶林道落車，當時有私家車的人係非常富有。如果我沒睇錯，應該係’56、’57年之後的事。咁點解我會知道，因為當時有個教友佢結婚，我睇番當時啲相，佢的車只可以係門口落。我就問點解唔駛入來，佢話入唔到，沒路入。新娘嘅花車喺度，個車入唔到。1956年都沒通車，所以話係’56年之後的事。因為建新堂，當時的牧師張榮岳，佢大概’51、’52年喺度做，佢以前細路哥嘅時候都係番呢間禮拜堂，未做牧師之前。佢好有計劃，佢同建堂委員會嘅領導下，有建中學的計劃。將舊禮拜堂拆埋，拆副堂，建新禮拜堂先。我哋叫第三代。建完之後，再建中學，中學就遲一兩年建好，大概’66、’67年左右。同一時間建新堂同建新中學，你會知道教堂的財政壓力好大。唔知道你哋知唔知，你哋而家讀嘅中學，叫受助還是津貼？（訪：津貼。）Subsidize，以前就唔係，以前叫私校，私立。私立就係學生要俾學費。而家你哋中四要唔要俾學費？

訪：唔使。12 年免費教育。

甘：以前係要的。私校建的原因，我相信就係想提供比較另類嘅學校，因為我嗰陣時都比較年輕，六幾年，沒參與呢件事，仲讀緊書。當時，香港好多私校，但係學費好貴，好似新法、威靈頓，有沒聽過？新法書院而家都唔做了。因為當時學生太多。我哋相信，有宗教信仰背景下辦嘅學校，係適合一啲當時求學的青少年。辦得都辛苦，因為我哋唔可以收太貴的學費。就算學費同出面個啲私校睇齊，我哋都儘量喺師資方面，我相信我哋都會花好大嘅努力找好嘅先生。

早期來講，張榮岳牧師來到七幾年就封為法政牧師，'78、'79 年封做副主教級。所以你而家見到出面有個副主教紀念堂，就係紀念佢。佢係負責當時整個聖公會中小學嘅發展，最重要嘅領導，佢會管晒。當時沒咁多學校，但到而家，連埋中小學，幼稚園，有過百間。佢有好多嘢管，當時學校實際校務工作係由主任負責的，校長就係張牧師。而小學、幼稚園，佢都係校長。至於後來，學校經營困難，有[好]多嘢要 **upgrade**，教會承擔唔起。同時有好多私校，因為費用太昂貴，所以做唔住。後來，經過好多研究討論，將學校轉為津貼。但係我哋係唔願意的，不過因為沒能力。原因係同我哋辦學嘅原意唔同。一轉津貼學校就受好多限制，有好多嘢唔可以照你的教育理念去做。所以而家來講，又可以講係走番回頭路，就叫做直資學校，佢哋就係唔想受政府的制肘。政府亦都唔想繼續負擔更多費用。所以兩方面，一方面政府唔肯全力承擔責任，所以另立直資制度。或者之後可以請你哋老師、陳校長，或者查資料咩叫直資。你哋就會知道點解咁多要轉。

而家轉直資，一年嘅學費，三萬、五萬都有的，即係每個月三、四千學費…淨學費，仲有好多其他嘅費用。如果你哋有沒辦法接觸到第一、二代嘅老師，最早期喺度服務過，其中有一個我而家都好少見，叫做陳佩學？。唔知你哋學校名冊有冇紀錄。佢係嗰度做主任，實際就係校長…職務上。如果你找到佢，佢會好清楚話俾你聽。另外，仲有早期的老師，有一個叫做陳寶珠，或者叫袁陳寶珠。佢喺度做過教師。陳寶玉喺小學教，陳寶珠就中學，佢哋係兩姊妹。當時，早期辦學，照我所知，好多先生係 **part time** 的。點解係 **part time** 呢？一啲時間就返大學讀書，一啲就落來教書，因為近。咁樣來講，一來薪酬方面比較沒津貼學校剝削得更厲害，二來學術水平都有番咁上下，一路讀一路教。但轉咗津校就有咗呢種情況，或者發展咗一段日子就有了。以前有啲主任，有一個叫梁生，好似叫梁金成…唔係記得好清楚。李品初先生後嚟去咗李求恩中學做校長，沒幾多個啫。

而家設備就咗好多，多咗好多房。我相信如果你唔轉，即係我哋學校唔轉津貼的話，喺設備上會跟唔上。如果要跟上，學費會加得好犀利。咁轉咗津貼，校舍嘅管理權就歸番俾政府，好似整 **lift**，全部都係政府做。因為整或者維修一座 **lift** 要好多錢，好多消防條例等等，呢個原因令好多私校做唔住。我哋做私校，我哋係唔牟利，出面的私人團體好多係牟利的。所以好多私校唔做，發展做地產。校舍幾大，做地產仲好賺，因為佢嘅目的就係賺錢。我哋嘅目的就係提供基督教化嘅教育，總而言之，我哋有能力就負擔，負擔唔到就諗辦法。所以可以睇到早幾年我哋小學停辦的原因。

最早期，我哋嘅私校好有規模。**1950** 到 **'51** 年好有規模，全港可以講係數一數二，又係私立的。後嚟因為學校多同埋我哋私校要收學費，相對來講，好多承擔唔起。我哋學生越來越少，我哋開過會…我唔係委員會…不過一個平信徒我哋都知道。當時，曾國偉會吏長負責禮拜堂嘅時間，佢哋定咗一筆款項，係留俾結束小學用的。臨到最後結束，宣布要結束嘅時候仲有三、四、五、六年班。不過宣布之後，保證同學如果願意喺學校讀到六年班，就算得番一班都開。喺當時來講係一個好大的財政負擔，因為一班同學，唔可以一個先生，要有校長，有兩三個先生。你教二、三十個學生，就係每個月薪金都好大。但係我哋都願意承擔，對家長、學生有個承諾，照顧佢哋讀完小學為止。我相信如果沒基督嘅愛係裡面，做唔到。因為你會計的，我要收你幾錢學費，當校舍唔計租，支出、電費係幾多？所以你可以睇到我哋嘅堅持喺呢度。我講到呢度，有咩其他問題？

訪：我想問番教堂同埋教會，例如教會方面當時 **1965** 年前，參加教會活動有邊啲人？同埋點解要興建新嘅教堂？

甘：第一個問題，我唔係好捉摸到。你係想問來參加教會聚會係咩人？

訪：主要係咩人來參加？

甘：我知道嘅早期，就係住喺附近嘅坊眾。戰前，鍾仁立牧師同埋好幾位，佢哋都興家訪，即係逐家逐家去探訪、去敲門。而家有咗，而家管理員都唔俾你入，而家就算你派單張都唔俾。大馬路…而家叫皇后大道西，西環、石塘咀、高街、學士臺、桃李臺、青蓮臺，有好多教友喺嗰度住。後來因為城市發展，有好多會眾搬離，但有好多都會返來自己母會。因為團契生活嘅原因，返開嗰度，有熟悉嘅教友。同埋早期嘅，

據我所知，有好多教友，幾代都係返呢度，爸爸媽媽、祖父祖母、子女，有幾個大家族，當然亦都有第一代來參加。有好多搬咗都會返來，移咗民就沒得講，但移民返來探親等，都會返來我哋呢度。我哋嘅教友各個行業都有，有啲職業比較一般，低下階層，收入微薄。亦都有啲好有錢的，個陣時已經有別墅，有遊艇、私家車等等，層面好廣。而且教會早期仲會係街頭傳福音、講道、教唱聖詩、演話劇。喺水街、桃李臺等等，度度都有。當時我哋都好有活力，年輕人與成年人。第二個問題係？

訪：點解要建立新教堂？

甘：我剛剛講過，主要因為唔夠坐。二百、三百人已經好犀利了，好多時崇拜要企喺度，同埋要分幾堂。有早堂、午堂。最早期，早堂就八點鐘，午堂就十一點。後來就有夜堂。有一段時期朝早有三堂…八點，第二堂好似九點半，跟住十一點，有三堂崇拜。後面發覺咁樣安排唔係好好，十一點就改為而家十點半，冇咗九點半堂。而家新堂…禮拜堂都唔新…’65年到而家…不過我哋慣咗叫新堂。我沒認真數過有幾多座位，應該有五百左右。點解我有呢個印象，因為好多時大時大節，例如復活節、聖誕節、受苦節或者新年除夕崇拜，我哋印週刊，過千張都唔夠派。即係有成千人啦，或者接近成千。個陣時，禮拜堂已經睇到，唔建係唔得啦，根本已經戰前籌備，已經睇到需要。

第二代禮拜堂應該係 1865 或者 1868 年建的，搬來這裡建，最早期應該喺大笪地，荷李活道而家有大笪地公園，有沒印象？東華醫院有沒印象？得閒可以行吓，一八六幾年喺個度。剛剛講咗第二代一八六幾年建，一九三幾年已經發覺唔夠用，要開始籌錢，要重建，建大啲。剛剛我沒講到，個陣時，而家禮拜堂位置屬於聖公會一個組織，叫婦人會，或者婦人館，係負責婦女福音工作。西差會…另外一邊亦都屬於教會，好似有一部分係屬於政府。有一部分係屬於我哋的，睇翻會知道。我哋一定要籌款，買晒全部地，先可以建到而家咁，呢度又係一筆錢。

我哋…可以咁話…戰後我哋嘅籌款，首先就建小學、建副堂。後尾拆副堂，拆呢間禮拜堂嘅舊堂再建新堂。三座大建築物－小學部、禮拜堂、中學，當時係一個好大大嘅工程，可以講話，我哋教會係憑著上帝信心來做。喺出面啲人睇來，係好大嘅冒險…你沒咁多錢就唔好做啦。但教會唔係的，我哋會諗辦法去籌款，我哋自然會睇到上帝的美意。

訪：你剛才提及到，教會籌款舉辦了好多活動，當時籌款活動的反應係？

甘：係好理想的，所以我哋當時有建堂委員會。如果你有時間可以睇吓我哋的堂刊，你會找到的。有一頁係好重要的，就係當時嘅人。而家我大膽啲講啦，你睇嘅名單，最近先沒建堂委員會，因為債務啲已經償還了。而家現存嘅人得番三幾個仍然在世，有兩個喺加拿大。我喺加拿大都見過佢，我有一段時間都喺加拿大生活，係我熟悉的。有一個係我太太的 **godmother**，伍冬瓊女士。佢今年九十幾歲，佢當年就係建堂委員之一。可以講建堂委員，喺度【嘅】都垂垂老矣。伍冬瓊女士當時只係二十、三十歲，而家已經九十幾歲。佢哋嘅熱心激勵咗我哋後一輩，如果唔係都沒而家嘅景象。

訪：我哋想問吓，新聖堂，即係第三代建築，同埋張榮岳會督紀念堂嘅設計師，伍振民先生，同埋佢父親伍福慶先生，都同呢間教堂有密切的關係，可唔可以講吓關於佢哋嘅事蹟？

甘：我唔敢話點樣講佢哋嘅事蹟，因為當時我仲年輕。我印象伍福慶先生當時係負責財務的。佢本身職業係…用當時的說話來講係師爺，係律師行的師爺。師爺即係幫律師做嘢，佢好熟悉法律。當時律師好少，我唔知佢有沒律師牌。佢係好好記性，佢同人開會，係唔需要寫紀錄。同一時間同好多人開會，講唔同嘅嘢。佢好熱心，佢嘅仔伍振民先生，前幾年亦都唔喺度了。佢係建築師，教會好多建築，教堂、學校都係佢負責。出面好多大廈…中環好多大廈，佢都有份做策劃去建的。佢係一個好傑出嘅建築師。同埋佢好熱心教會好多嘢。我諗你最好有機會訪問而家伍家後人，好似叫伍家嶸，喺我哋禮拜堂，我哋叫牧區議員之一，佢係三十幾歲。我同佢唔熟，我以前都係呢間禮拜堂的牧區議員，但呢幾年我就沒做了。我好早期做牧區議員，一九七幾年做了，斷斷續續咁做，你不如問番佢，我唔太熟悉。不過佢設計聖堂好有心思，你可以睇番佢寫嘅文章，我亦都節錄在講本，你可以查番。佢介紹點樣要咁設計，當然喺當時來講，係好嶄新嘅設計。亦都有教友…我都有在內，我哋參加咗舊堂崇拜，我哋可能先入為主，我哋覺得外型來講，我哋鍾意舊堂多啲，新堂來講好似太過現代化。而家新禮拜堂來講，就唔係哥德式嘅啦，因為哥德式佔地好多，建築費好昂貴。你而家見到聖公會新禮拜堂嘅形式，都唔係咁㗎喇，你去沙田，新界、九龍深水埗基愛堂、錦田聖若瑟堂、元朗聖馬提亞堂，或者將軍澳施洗聖約翰堂、沙田靈風堂，佢哋禮拜堂，都唔係哥德式㗎喇，好現代化。

所以外形設計好唔好係好主觀的，不過嗰陣時來講係好嶄新的。因為限於地方，我相信咁樣設計係最好的，喺地方運用上來講。當然唔可能照舊陣時嘅哥德式，可能要多一倍嘅地方先可以容納到咁多人、咁多座位。但係可以咁講，睇地方、睇經濟，當時係全港第一間禮拜堂有冷氣，唔單止聖公會。我哋希望有寧靜環境來崇拜，聽唔到車聲的。尤其六幾、七零年代車都沒咁繁盛，我哋已經都設計到咁樣。好多得佢哋心思，好多音響，燈光等等嘅設備。你入到去【睇到】啲牆壁，金碧輝煌，油咗金色嘅。當時係耐嚟的，佢花費了好多功夫的，可以睇到佢嘅心意。

訪：不如講吓新聖堂的特色，例如壁畫，聖壇，有咩特色？

甘：初初嘅壁畫，就係牆邊嘅十四苦路係冇嘅，而家你見到個排。每一個窗，我哋叫窗，一格一格有壁畫的，係唔係？係以前冇的。有一度不可不提，或者好多人忽略咗，我哋禮拜堂啲門、木板、玻璃係有圖案的，沒重複的…照我所知…好靚的。我呢本嘢都有提過的。每一個…如果你要查考…係有佢嘅故事的。但我就唔可能…唔識一一做到介紹。相信好多人都有留意，玻璃紋而已。你返來留意吓，隻隻門唔同，每塊玻璃唔同，可以睇得出張榮岳副會督的心思。

仲有一點不得不提，好佩服張牧師，當時我嘅學道班、洗禮班，佢主要負責教我。我哋要上堂的，每個主日早啲返來，上足好多堂先可以洗禮。佢學問好淵博，佢教道好精闢，唔長的，十多分鐘左右，仲有個叻之處，佢嘅講章，我見過佢手上拿著張好細張嘅紙仔就講了，佢唔會點睇的。可能佢已經構思咗篇講道，佢好多時講道，引經據典，除咗聖經經文嘅話語，仲有好多中國好多嘅四書五經，孔孟之道，好犀利。佢英文好叻，聽講十七歲 **Hongkong U** 畢業，十九歲就喺廣州市聖三一中學做校長。佢好叻仔。佢仲有一樣嘢，佢做牧師期間，佢 1951…或者 1952…英女王策立，代表香港新聞界去出席典禮，全港得一個。因為當時識英文的人好少，咁點解佢代表？有冇聽過華僑日報？後尾做唔住。佢喺華僑日報翻譯部編輯，主管來的，所以佢工作時間好長，日頭做教會事工。除咗我哋禮拜堂，仲有聖公會…當時屬於港澳教區…當時有叫教省…喺教區事奉，佢負責幫當時何明華會督，佢左右手來的，幫佢負責教育。同理有個張紹桂會吏長，佢太太張盧樸卿做過呢度嘅校長。呢兩個主要負責。因為當時張紹桂會吏長仲喺香港政府教育司署做…好似校外課程…做主管，所以張副督會比較吃力一啲。佢又要做教會事工，又要做教區事工，都係咁樣做，佢好旺盛。我聽工友講，佢夜晚十點幾會返華僑日報。因為報館係夜晚做，早上出報紙。翻譯到兩、三、

四點，先收工再返來。如果第二朝係星期日就更早起身，所以佢精力好充沛。可能因為咁樣…人的體能有限…佢都好早死，’79年死，佢有 **cancer**，佢喺醫院我有探過佢，可以講係積勞成疾。佢多才多能，佢好拿手煮嘢食，佢好多樣嘢都識的。我好佩服佢嘅學問淵博，講道精闢，好多精警句子。有一句我記到而家，同你哋分享吓。我唔記得係學道班還是講道講的，呢句說話就係：「上帝祝福，眼仔碌碌，上帝唔祝福，豆豉都有得篤。」講出來你可能覺得好奇怪。就係上帝祝福你，你就精神飽滿，好精靈了。上帝唔祝福，豆豉都有得篤。知唔知乜係豆豉？豆豉鯪魚！因為當時好貧窮，做餸係沒咩的。有錢人家就有啦，一般人家就鹹魚青菜。所以有一首歌就係鹹魚青菜都好好味。其實當時一般普羅大眾都係鹹魚青菜。再窮啲就食豆豉欖角，去雜貨鋪買斗零，當時斗零五仙，買豆豉，欖角就係三角形，蒸餸個啲。我哋如果可以就切一兩片肥豬肉落去蒸，全家就係食啲碟餸，篤豆豉。如果上帝唔祝福你，即係窮到你豆豉都有得篤了。呢句說話喺當時係好有共鳴，因為當時我屋企係好貧窮的。我真係連豆豉都有得篤。我哋試過窮到…油鹽飯你聽過未，冇餸嘅。就係裝啲白飯出來，撒少少鹽，落少少油喺飯面度，就咁就一餐，當時好貧窮的。所以呢句說話我印象好深刻。

訪：咁其實新聖堂嘅聖壇點解設置喺會眾同詩班前面？

甘：呢個係一個創舉，喺聖公會來講。而家你見聖公會禮拜堂都係跟咗呢個 **pattern** 的。我唔知最早係唔係由英國開始先。以往禮拜堂一入去，去到正，分開三部分，一部分係會眾，第二部分係聖壇，或者叫做至聖所，盡頭就係聖牆，上面可能有 **symbol** 十字架，係咁樣的。以往好多[係]咁樣的，詩班席喺出面的。而家咁改咗，我相信嘅意思就係我哋崇拜嘅主題…主角…上帝喺我哋中間，親臨我哋中間，所以至聖所喺中間。我哋叫聖壇裡面嘅聖牆，就喺中間，周圍就係信眾，詩班都係信眾的一部分。坐下面嘅信眾我哋叫做平信徒。共同仰慕上帝。所以而家你見，就算舊的禮拜堂，佢都將聖壇移去中間。

訪：我哋聽講過呂大衛先生提及過喺教會迎接 150 週年的時候，設法將新聖堂睇起來係尖的，咁點解會咁？

甘：咁點解係咁樣就要問番設計委員會，設計小組。我就有一個睇法…我相信都係有一啲平信徒嘅睇法…其實新聖堂建好後，外觀上，出面坊眾揸車經過，唔發現有一間禮拜堂。如果喺般咸道，除咗頂嘅十字架，喺鐘樓上唔發覺。同舊陣時唔同，以前架

車經過就會知係教堂，等於你去聖安多尼堂，你經過就知係聖堂。如果咁建就希望凝聚一啲集體的回憶也好，腦海印象。我懷疑啫，我沒睇過圖則，我知道佢哋而家做繁設計，佢嘅模式點樣仲未公布，可能仲沒有定案。佢哋個陣時問我，我都話希望睇起上來似番啲俾人一般嘅印象。尤其是沒宗教信仰嘅人，佢嘅印象停留係圖片，或者係聖誕卡，教堂就係咁的啦，西方式的，要俾人一種印象。至於係唔係真係咁，要問番個設計小組。照計多啲設計 **symbol** 係好的，趁著 150 嘅時間，做番啲工作都係適當嘅時機。

訪：咁我哋講返教堂換物會，咁以前同而家有咩唔同？

甘：正如我剛剛所講，佢剛開始純粹係換物籌款。當時好多人來換物，發覺啲嘢好抵，咁少金額，張換物券可以換到咁多嘢。不過，呢幾年就唔係了。聽到啲人來到，好貴喔，貴過出面好多，知唔知點解？

訪：物價上漲？

甘：唔係主因，最主要係香港社會環境轉變。因為早期換物會，照我所知，係我哋好多教友，佢好熱心，除咗自己捐款，佢仲係親戚朋友當中物集，因為好多親戚朋友屋企或者家族係開工廠，開大嘅商店等等，佢哋捐出來一批貨，唔使錢。我哋要籌款，我哋 **mark up** 呢啲貨，約莫知道呢啲貨出面幾多錢，便定呢個數目，吸引更多的人來換。我可以咁講我哋嘅成本係好輕的，但係而家社會環境轉營，香港沒咩工業，沒咩廠。而且老一輩嘅人已經唔嚟度，新一輩的社交網絡沒咁廣泛，唔可以接觸到呢啲人。咁樣來源就少了，大多數靠教友金錢上的奉獻，俾每一檔嘅人出去買嘢。要按批發價俾你，都要接近市價，入貨價。你唔能夠以入貨價來賣俾換物嘅人，你一定要 **mark up**，就一定貴。而有啲貨係去到深圳，大陸買落來，平啲。但係你運落來要運費，你上去買貨量不及做生意的人，所以一定貴。

訪：咁以前換物會同而家有咩唔同？

甘：而家來講，前幾年就改做西南聯區換物嘉年華。除咗原有的檔口，仲多咗好多表演，個個負責單位的表演，好似你哋中學部有，以前小學部都有，而家沒小學部。幼稚園都有攤檔。其他有聯繫的社區中心都有檔口，食物，手工教細蚊仔點玩。咁有呢類嘢，形式多樣化了。坊眾上，而家少咗好多學生家長，你哋中學部，來嘅家長唔

多，我相信。反而同學嘅朋友，兄弟姊妹會多。因為我哋沒小學，沒小學家長。小學好緊要，小學好踴躍的。幼稚園，我相信環境令就學人數唔係好多，嗰類都影響到，所以就靠我哋的教友。所以我感覺上，來參加的人數，沒早二、三十年前咁擠湧，以前擠滿晒人。二來，以前換物會係拿來籌款來還債，而家唔使還。我哋商議過會唔會停辦，不過我哋覺得係傳統，週年教友相聚時光，唔係錢的問題。係一個凝聚埋一齊為一件目的來做嘢。我哋嘅目的以前就幫教會籌建經費，而家幫教會，有一部分係俾聖公會福利協會，俾佢哋做經費。詳細金額我唔記得了，你可以查得到，係俾山道聖公會老人中心，同埋幫助西南聯區。咩叫西南聯區？係我哋聖公會香港島教區一個新嘗試。無可否認，我哋嘅物質、金錢資源上係比西南區其餘的兩間教會係充裕。但哋嗰兩間聚會人數沒我哋咁多，財力沒我哋咁好。但佢哋都要發展，發展就要錢。錢從何來，就由我哋籌款項，幫佢哋手。西南聯區有三間教堂，一間喺堅尼地城聖路加堂，一間喺華富邨，叫做聖提摩太堂，佢有獨立堂址，佢喺呂明才中學裡面的小聖堂。你哋到過未？得閒搭 40M 去到總站，去望吓，隔離就培英中學。但係佢發展有牧民中心，喺香港仔。係邊度？香港仔搭 7 號車，經過聖伯多祿小學，喺個山坡仔隔離嗰座大廈就係牧民中心。牧民中心係拿來做社會服務的工作，幫助青少年，一齊溫功課。每個禮拜一晚…還是兩晚…義診，幫佢哋睇病，個醫生叫唐醫生，係佢哋教友。有好多社會服務，興趣班喺嗰度。至於聖路加堂，佢有應該六十一年歷史。佢呢一兩年亦都開始牧民中心，喺域多利道，西環巴士總站，馬會診所隔離，叫聖路加福群會。嗰一間小聖堂，叫做石屋仔，係一啲麻石…佢哋將麻石油成白色。星期日八點鐘有崇拜，係俾啲老人家。因為佢唔使行上山上嘅聖路加堂，其餘時間有溫習室。好似一至六都有開放，我哋有一個社工還是幹事，喺嗰度負責。變咗近呢幾年，我哋個間教堂都好努力，做一啲福音推廣宣傳工作，吸引更多人。而家宣教方式唔同以往，以前係家訪，而家唔得。街頭做佈道會唔得。而家就轉咗牧民中心，幫助有需要的人，係從中俾佢哋有機會接觸到，感受到基督教的愛心。唔係監佢聽，你來聚會、有人教你做功課。唔係要先聽一輪講道、讀經先。係無條件的，你來就可以。我哋有好多書籍擺喺嗰度。我哋希望潛移默化，用行動來到宣教，唔係話靠把口。

訪：咁我哋今日訪問都到此結束，好感謝你。

甘：希望我講的與現實沒好大距離。

(訪問完)